

BONERIANO®

Silensio ta un di e arte nan mas grandi di kombersashon.

EDITOR:
Bonaire Communication Services N.V.

Djaluna 3 yùli 2023 | Preis: \$1.25

REI TA PIDI PORDON

Selebrashon dia di bandera



CHANGAN AUTO

HUNTER

[/dabboussimotors](#)

LIVA FM 99

HAIR BARBERSHOP

Hanchi lenks pabou di Gas Ekspres

Habri 5 dia!
Tel: +599 788-2228 / +5999 529-2228

[hair cut](#)

[www.hairbarbershop.com](#)

EDITORIAL

Kòma òf . òf ?

\$10 FREE SLOT PLAY

Sign up for your FREE Player's Card and receive \$10 in FREE Slot Play!

Open Monday - Saturday 8pm to 4am | Sunday 7pm to 3am | (599) 717-3504
[diviflamingocasino.com](#) | ATM available

DIVI FLAMINGO CASINO

MANTENE BO VEHIKULO OF EKIPO DEN KONDISHON KU PIESANAN KUMPRA NA NAPA

NAPA

xerox™

OBERSI ELECTRONICS BONAIRE

Soña tokante un futuro konhunto

Pa: Auke van der Berg

KRALENDIJK – Djasabra e aña di konmemorashon di pasado di sklabilitut a kuminsá. Segun e gobièrnu, pasado di sklabilitut ta penoso, importante i te ku korto un parti vago di parti di nos historia. Desde promé di yùli 2023 den henter Reino ta dediká atenshon èkstra durante e aña di konmemorashon di pasado di sklabilitut. P’esei rònt di promé di yùli 2023, Gobièrnu ta presente na diferente momentu di konmemorashon i selebrashon.

Naturalmente ya bo por a kai ariba tokante e palabra ‘èkstra’ mas ariba. Komo sifuera ya tabatin asina tantu atenshon pa e pasado ei. Pero awe mi a warda

mi sinismo i sospecho den un kaha i ta bai mira ku hopi alegria na futuro. Motibu pa esaki ta e plan di ocho punto pa mas vishon i reforsamentu sosial i ekonómiko di e parti Karibense di Reino di Dorian Wuite, miembro di Tweede Kamer di D66.

Ku e plan, Wuite polítikamente ke mira pa yega na un desaroyo duradero dirigí pa loke ta trata Karibe Hulandes. Loke ta hasi e remarke akí interesante ta e siguiente: “Ta mi deseo personal pa ku e aña di konmemorashon akí tokante pasado di sklabilitut Reino bini ku e ròl Hulandes den e historia i mas aleu por papia di e pasado penoso



akí. Sí te asta nos por soña tokante un futuro konhunto dirigí riba reforsamentu duradero sosial i ekonómiko ku ta mehorá e bienestar di tur hende riba e islanan, ta un pregunta ku gustosa-

mente mi ke trese dilanti.”

Sí un aña ta muchu pèrtá pa bini den Reino ku e ròl Hulandes den e historia, ta laga demostrá ku Wuite ke mira dilanti. I esaki ta bon den e aña di konmemorashon akí. Konmemorashon ta enserá kiko nos ta bai wak pasado, pero tambe ku for di esaki nos ta siña lèsnan pa e futuro.

Tokante e futuro, aparentemente e parlamentario ta insigur. E ta puntra su mes, sí te asta nos por soña tokante un futuro konhunto. Komo kontinuashon di e frase akí por saka afó ku Wuite tambe sí ta komprondé ku ta bira fèrfelu pa soña sí bo tin stoma bashí. Su vishon riba e futuro komunitario ta dirigí riba un reforsamentu duradero sosial i ekonómiko ku ta mehorá e bienestar di tur hende riba e islanan. Un ratu mi a pensa ku dor di e frase akí mi

mester bolbe saka e kaha for di kashi. Pasobra tanten ku polítika Den Haag ta kombati pobresa riba e islanan solamente ku komishonnan, investigashonnan i rapòrtnan, pa hopi hende no tin mashá pa soña.

Pero Wuite a bai mi dilanti. E ta skirbi: “Desde e último kambio di Statüt na 2010, tin entre otro un akтитut di desinteres, neokolonialismo, opinion frus figo i retraso finansiero, ku a kontribuí na e falta di noshon i frustrashon entre Den Haag i e seis islanan Karibense. E konsekuensia di reakshon i te asta maneho maneho diskriminatorio ta señalnan enfátiko ku e prinsipio di igualdat dentro di Reino ta kibra mas aleu i ku derecho humano i un eksistencia humano no tur kaminda ta keda garantisá mesun bon den e òrdu di derecho di Reino.

Den Parke Nashonal Washington

Monumento di sklabilitut desvelá

KRALENDIJK -- Durante un seremonia kòrtiku djasabra atardi, ku presensia entre otro di Minister Hugo de Jonge, a desvelá un monumento pa konmemorá sklabilitut den Parke Nashonal Washington-Slagbaai.

E monumento ta situá riba e seru bai ariba na Boka Slagbaai, ku un bista magnífico di laman. Despues di

un lesamentu di un poema dor di Linda Coffie, Minister de Jonge, Gezaghebber Nolly Oleana i outor Delno Tromp, tur a hasi un diskurso kòrtiku. Na honor di e okashon, Tromp a presentá un buki trilingual titulá ‘Mil ochoshentikurantidos’, ku ta kontené historianan personal, faktornan históriko i poemanan relashoná ku e

tema di libertat i sklabilitut.

E tablero ku a pone na e monumento, ta rendí homenahe na e poblashon indígena original di e isla i ta enfatisá ku mester rekonosé i komprondé e pasado turbulento di e isla, pa por konstruí un futuro basá riba rèspèt i kompreshon di e historia di tur hende riba e isla.



E monumento ta ofresé bista mashá bunita, tantu mirando pa e serunan i tambe pa laman. (Potrèt: ABC Online Media)

Pa info i komunikado den

**Extra/
BONERIANO**

Redakshon:
extrabon@gmail.com

Aviso mail:
avisobon@gmail.com

REI TA PIDI PORDON

KRALENDIJK – “Pa e opvio falta di akshon kontra e krímen kontra humanidat mi ta pidi awe pordon.” Palabranan ekspresá pa Rei Willem Alexander djasabra na selebrashon di Ketu Koti, ku a marka tambe inisio di e aña di konmemorashon di 160 aña di liberashon di sklabilitut.

E selebrashon di Ketu Koti, na kua Rei Willem Alexander i Reina Maxima a asistí, a tuma lugá den Oosterpark den e siudat Amsterdam. Diferente minister di gabinete, entre kua tambe e ministernan plenipotensiaro di Aruba, Kòrsou i St. Maarten, a asistí.

Na final di su diskurso, Rei Willem Alexander a risibí un ovashon na pia serka tur presente. Demonstrando asina kon importante e palabranan aki tabata. Aña pasá 19 di dezèmber Minister Presidente Mark Rutte a ekspresá su diskulpa pa e pasado di sklabilitut. Hopi a konsiderá e momentu di diskulpa di Hulanda komo históriko transendental. Apesar di esaki, e diskulpa a sòru pa emoshon miksto. Lunanan largu a suprayá e nesidat di un diskulpa di parti di Rei Willem Alexander. Awor esaki a sosodé.

Kontroversial

Rei Willem Alexander a kuminsá su diskurso referiendo na un stipulashon di 1644 na Hulanda ku ta bisa: “‘Binnen der Stadt van Amstelredamme ende hare vrijheydt, zijn alle menschen vrij, ende gene slaven.’ Pues dentro di e siudat di Amsterdam tur hende mester ta liber di sklabilitut. Anto tòg Hulanda tabata praktiká komèrsio di katibu. Un situashon kontroversial. Rei: “Huntu ku boso mi ta pará aki den e siudat Amsterdam ku pa siglonan kaba ta apresia i stima li-bertat riba tur kos. Kapital di un pais ku den transkurso di historia semper a lucha kontra tirania i opreshon. Pero loke dentro di e siudat aki tabata algu di mes, no tabata kuadra pafó di nos frontera. Aki sklabilitut tabata prohibí. Otro banda di oséano nò.”

Denigrante

“Di tur e forman di no-libertat, sklabilitut ta esun mas grave, mas denigrante, mas degradante pa e ser humano. Mira bo ko-próhimo komo merkansia, di kende bo por disponé segun bo ta haña bon. Un mashin indefenso ku kua por hasi

ganashi. Ku bo por kadená, bende, marka ku heru kayente, bati, kastigá i te asta mata.”

Rei Willem Alexander a sigui bisa ku e último tempu aki nan a sostené hopi kombersashon, tantu na Hulanda komo riba e islanan den e parti karibense di Reina Hulandes. “Nos a papia ku hendenan ku tin nan rais na Sürnam i tambe ku hendenan ku tin un konekshon ku Indonesia. Entre nan hende ku mester bai solamente tres generashon promé pa topa ku un miembro di famia ku a nase den tempu di sklabilitut. Nan a mustra nos a doló ku nan ta sinti.”

“Bos di esnan sklabisá a bai ku bientu. Apénas nan a laga spor atras. E ta lanta rèspèt ku no tiki di nan a haña forsa pa rebeldiá, anke esaki hopi bes tabata ku e kurashi di desesperashon.”

Nos sa mas

Danki na trabou di investigadónan pashoná nos sa awor mas di e pasado di sklabilitut hulandes, segun Rei Willem Alexander. “Nos sa awor ku a transportá mas ku 600.000 hende riba barkunan hulandes for di Afrika atraves di Oséano



Atlántiko pa hende komo katibu òf pa usa den trabou riba plantashi, Tristu ta ku 75 mil di nan no a sobreviví e transportenan aki.”

“Nos sa tambe den e komèrsio di katibu pa oriente, na paisnan bou di régimen id VOC. I nos sa di e krueldatnan kontra e poblashon indígena den e kolonianan. Pero tin asina tantu kos ku nos no sa. Den archivonan por mira sifranan seku. Nan ta etalá nos e echanan pa medio di brel di e atministradó finansiero. Pero bos di esnan sklabisá a bai ku bientu. Apénas nan a laga spor atras. E ta lanta rèspèt ku no tiki di nan a haña forsa pa rebeldiá, anke esaki hopi bes tabata ku e kurashi di desesperashon. Luchadónan di resistencia manera Boni, Baron i Joli-Coeur a reta e sistema inhumano di sklabilitut den áreanan ekstenso di selva i urizjan na Sürnam. Nan heroismo – i di esun di otroan – ta testiguá un orguyo i forsa ku no por

kibra.”

Tula

Rei Willem Alexander a referí den su diskurso tambe na Tula, katibu di Kòrsou: “Tin bia a sosodé ku a tras pasá bos di un luchadó pa libertat pa nos via palabra skirbí. Manera e bos di Tula, lider di e rebelion di katibu na 1795 na Kòrsou. Sinku luna pasá nos tabata huntu ku nos yu muhé mayó na e sitio na unda el a traha i biba: e anterior plantashi Knip.

Kon rasonabel i humano e palabranan di Tula ta zona den nos oreanan moderno. El a apelá riba idealnan di Revolushon Franses i e igualdat di tur hende, sin importá nan koló.

“Nos no ke hasi niun hende algu malu”, Tula a bisa. “Nos no ta anhelá nada otro ku nos libertat.” E outoridat na poder e tempu ei a reakshoná brutu i sin miserikòrdia.

A habraká Tula i a kita su kabes afó.

Referendum Telbo

KRALENDIJK- Mañan, djamars 4 di yùli lo tuma lugá un referendum bou di empleadonan di Telbo N.V.

Esaki mediadó ta duna di konosé. Meta di e refe-

rendum ta pa determiná kua sindikato lo keda apuntá pa mayoria di e empleado pa representá nan.

E referendum ta tuma lugá na ofisina di Asuntunan di Labor (SZW) den

sentro di siudat 1.30 pa 2.30.

Mediadó ta hasi un yamada na tur empleado pa hasi uso di e derechi aki, i partisipá na e referendum.



EDITORIAL

Kòma òf . òf ?

Por konsiderá promé di yüli komo un dia históriko. Un dia ku segun nos konsepto ta bai mas leu ku diskulpa i pordon di parti Rei Willem Alexander. Dikon e ta históriko? Pasombra si nos ke òf nò, a pone e spil di sklabilitut nos dilanti. Den reino e topiko aki a tuma un poseshon importante, prinsipalmente na Hulanda, konstantemente ta pone atenshon riba esaki den media, skolnan i asta den parlamento hulandes. Desendientenan di kabitu ta halsa bos eksigí por lo ménos rekonosementu di e sufrimentu i inhustisia grandi hasí na nan antepasadonan.

Aña pasá dezèmber promé minister Mark Rutte a pidi diskulpa pa e pasado di sklabilitut i alabas a bisa ku esaki ta un kòma.

Hopi lo lesa e editorial aki i ninga ku na Boneiru tin un tabú rondó di sklabilitut i e konsekuensianan ku ta bin kuné. Tin ku lo trata asta na kondená nos medio enbes di brasa e mensahe. Si ta asina, kon Boneiru lo yena loke mester bin tras di e kòma, si nunca nos ta papia habrí tokante e topiko aki? Un topiko ku apesar di ta inkómodo ta nesario pa krea generashonnan orguyoso di nan orígen. Kon nos por logra esaki dor di apliká strategia di abestrus, hinka nos kabes den santu?

Sin ni sikiera konsiderá ku konsekuensia di sklabilitut ainda por ta kore den nos benanan? Ku nos manera di pensa i aktua por tin di aber ku e pasado aki? Al final ta apénas tres generashon pasá por papia di libertat, mas ku 350 aña di sklabilitut mester a hasi algu ku desendientenan. Ku e historia di sklabilitut tin di aber ku nos mentalidat di awendia? Apesar di esaki pa un motibu òf otro tin e impreshon ku e komunidat boneriano ta mas distansiá di e historia doloroso aki. Sporádikamente por nota algu di atenshon, aunke mester atmití ku tin mas atenshon pa e kasnan di katibu ku pa e historia di sklabilitut. Miéntas diferente grupo di diálogo di sklabilitut den reino tabata konsehá mas riba e topiko di diskulpa, nos propio grupo di diálogo no a haña un diskulpa nesario. Nan a sali i papia pa Boneiru kreando un impreshon ku bista riba e futuro ta mas importante. Lógikamente esaki ta un bon punto di salida, pero kon nos por fiha riba un futuro sin para ketu na e daño di pasado ku te ainda tin influensia den presente.

Komo medio di komunikashon nos ta ninga na tapa solo ku un dede, nos ta nota konsekuensia di sklabilitut strukturalmente. Kon otro nos por akclará e konstante bataya pa preservá i halsa nos propio idioma Papiamentu? Kon otro nos por akclará ku ainda nos historia di sklabilitut no tin un lugá prominente den kuríkulo di nos skolnan? Kon otro nos por akclará e divishon ku tiki tiki pero sigur ta nota den nos komunidat entre e pretu i e blanku? Kon otro nos por akclará e señalnan di neokolonialismo? Kon otro nos ta akclará e strategia di dividí pa konkistá? Kon otro nos por akclará e mito ku esun blanku ta superior?

Promé di yüli ta djis un fecha mas pa konmemorá algun página skur di nos pasado òf di bèrdat ta bai traha riba e konekshon ku Rei Willem Alexander a boga p'e? Lo lanta gruponan di teater den bario i usa kreatividat pa konsientisá?, SGB lo introdusí banda di e 'Parse Vrijdag' un 'Zwarte Maandag' pa konsientisá nos hóbennan?, Organisashonnan kultural lo organisá kaminatanan di sklabilitut pa amplia konosementu? Partidonan Polítiko ta sali i reashoná ferviente riba e topiko aki tambe? Nos lo drenta un época ku organisashonnan primordial manera Kuerpo Polisial Hulanda Karibense (KPCN), Rijksdienst Caribisch Nederland (RCN), Ministerio Públiko (OM), Fundashon Mariadal (FM) kontinuamente lo organisá treinen pa nan kolaboradónan splikando e konekshon entre pasado di sklabilitut i diskriminashon institushonal?

Gobièrnu lo kuminsá ku un kampaña di konsientisashon?

Kada kanal di televishon, programanan di radio, spòt, podcast, lo amplia tokante e topiko aki? Konsientisashon di nos dushi pueblo lo ta ankrá den kualke programa di gobernashon? Nos tambe lo yega asina leu? Manera desendientenan di katibu den otro parti di reino, Sürnam i Indonesia? Nos tambe lo por papia, aseptá e pasado komun i di bèrdat traha riba e mihó futuro? Sin pretendé ku e no a i ta influensia nos komunidat te ku e dia di awe?

Asuntu di mucha chikitu

Pa: Fittipaldi Pietersz

KRALENDIJK -- Un asuntu komo sifuera ta mucha chikitu tin den gobièrnu i ta sinta laga ken

ku ta, muestra ku nan a bai Hulanda i no mester a bai. Dikon mi ta bisa asina, tur biá, tur aña ku tur partido

polítiko e mes un storia pa traha notisia rònt di dje, ku polítikonan a bai Hulanda innesesariamente, òf nan

no a informá pueblo.

Ègt e kos akí ta un asuntu hopi mucha chikitu. No tin otro palabra pe. Esei ta konta pa polítikonan i esnan ku ta kritiká nan. Mas bien polítikonan. Dikon nan mester sali i bisa awor i pa semper ku un biahe pa Hulanda ta nesario òf no. Anto sí e ta un mester, ku nan mester bai pa motibu di trabou, momentu ku nan regresá, konta kon a bai i kiko a hasi aya. No bin sinta papia tokante ken no tabata ke pa nan a bai Hulanda, ken no gusta ku e kos a bai asina. Ta fuerte i bisa niun hende no tin nada di bisa.

Òf nan mes bai Hulanda. Si gobernantenan a bai pa un bon motibu, konta di esei. No reashoná riba e remarke di otronan. P'ami tur biá e kos ei ta un idiotismo di marka mayó. Anto esei sí ta laga sinti ku bèrdat polítikonan a bai Hulanda sea mal prepará, òf no tabata nesario.

Spera tur polítiko komprondé i ta fuerte i stret. Mi a skucha un parti di e loke esnan ku a bai Hulanda a bisa na Radio Live 99.9FM, sierto momentu mi a legu-mai skucha radio. Pasobra mi no ta interesá den ken no ta ke pa nan a bai Hulanda.

Kantidat transakshon inusual a subi eksplosivamente

KRALENDIJK – E kantidat di notifikashon di transakshon inusual na Karibe Hulandes durante e último dos añanan a subi eksplosivamente, di ménos ku 900 na 2002 pa 7.456 na 2022. Esaki a sali na for di e relato anual di e unidat di inteligensia finansiero di

Hulanda, FIU. FUI ta yama e oumento komo konsekuensia direkto di e kambionan den e lei pa evitá labamentu di plaka i finansiamentu di terorismo BES entrante yüli 2021, ku a reforsá e posishon di informashon di e servisionan di detekshon.

Un parti grandi di e

7.337 notifikashon di transakshon inusual, ta bini di bankonan. Un kantidat di 728 transakshon despues di investigashon, a haña e stèmpel di sospechoso. E dokumentonan relashoná ku esakinan a keda pasa pa entre otro Polis pa investigashon mas aleu.

Supervishon estrikto riba estadia ilegal

KRALENDIJK -- Entrante 15 di yùli Koninklijk Marechaussee (KMar), ta bai supervisá di manera mas estrikto riba estadia ilegal ora ta biaha òf sali di e isla. E kadena di estranhero Karibe Hulandes, ku ta konsistí di KMar, Servisio di Imigrashon i Natura-

lisashon Karibe Hulandes, IND, Asuntunan Sosial i Empleo Karibe Hulandes, SZW CN i Kuerpo Polisial Karibe Hulandes, KPCN, pa basta tempu kaba ta konstatá ku tin un oumento den estadia ilegal na Karibe Hulanda.

KMar ku na Karibe Hu-

landes, segun e lei di seguridat BES mediante e lei di atmishon i deportashon BES, ta enkargá ku e tarea di supervisá frontera entrante 15 di yùli i ta kuminsá chèk e terminonan legal korekto di tantu estranhero komo hulandes na un manera mas estrikto.

Na momento ku surpasá un término, ya kaba tabata duna un but. Entrante 15 di yùli KMar por entregá un proposishon pa deklarashon indeseá na IND CN, banda di e but di sèn na momento ku surpasá e término. Por deklará e estranhero, òf hulandes, komo indeseá pa

Karibe Hulandes pa periodo indefiní. E ora ei KMar lo nenga e estranhero òf hulandes entrada na momento ku e biaha pa e isla. Por haña mas informashon tokante e tema 'estadia' riba e wèpsait di Rijksdienst Caribisch Nederland: www.rijksdienstcn.com

Lei nobo a drenta na vigor

Tur Sur Koreano ta bira un òf dos aña mas yòn

KRALENDIJK/SUR KOREA – Sur Koreanonan desde e siman ku a pasa tur ta bira un òf tin biá, te asta dos aña mas yòn. Un lei nobo a drenta na vigor ku ta skrap e método pa kua awor ta desifrá nan edat te ku awor.

Sur Koreanonan te ku awor ta usa solamente tres sistema pa indiká un hende su edat. E sistema mas usá ta esun kaminda sero komo edat no ta eksistí. Beibinan na nasementu ta un aña i na kada kambio di aña, pues dia promé di yanüari, ta bini un aña aserka. Un hende ku nase na desèmber

dentro di un luna pues ta dos aña bieu.

Serka e di dos método beibinan na nasementu sí ta sero, pero seguidamente durante kada kambio di aña ta bira un aña mas bieu. E di tres sistema ta e sistema ku nos konosé, kaminda ta nase na sero i riba dia di nasementu ta bira un aña mas bieu.

Pa yega na un fin di tur e diferensianan akí, Parlamento na desèmber a aseptá un lei dor di kua Sur Korea desde awor ta usa e sistema internashonal. E kambio a drenta na vigor siman pasá i mester trese un kambio na

e kantidat di bruashon, no solamente pafó di e frontera di pais.

Problema práktiko

Tokante kon e promé método ku Sur Korea te ku awor mas ta usa, tin hopi inkларidat, dosente di estudio di Korea moderno, Koen de Ceuster, ta konta. “No ta eksistí univósidad tokante esaki, pero mi teoria ta ku e konsepto sero no konosé e tempu aya e konteo di edat ku a yama un ser humano den bida. Na momentu ku bo nase, bo ta eksistí i pues bo ta unu.”

Tòg a bira tempu pa

kambio. E ta okashoná hopi bruashon, por ehèmpel sí ta trata di uso di remedi, Ceuster ta konta. Komo indikashon tin ku mucha bou di sinku aña no por usa e remedi, ki edat ta usa e ora ei. Muchanan di tres segun konteo Sur Koreano por ta sinku aña.

Tambe tempu di bakuna di Corona a originá problema. E tempu ei a invitá hendenan pa grupo di edat, pero hopi biá nan no tabata sa kua edat nan mester a

mantené.

Edat sosial

Segun Ceuster, e sur koreanonan semper ya tabata sa kiko nan edat ta segun e sistema ku nos ta usa, pero nan lo mensioná nan edat awor ku e lei nobo a drenta na vigor na momentu ku puntra nan pa nan edat? Nan lo mantené e edat sosial, esei nan ta haña muchu importante.

Solamente nan papelnan ta kambia.

Programanan di Bonaire.tv

TELBO kanal 70
Flamingo TV kanal 23

Djaluna 03 yùli 2023

12.00 Aktualidat:	Miles Mercera
13.00 Aki Boneiru:	Rafael Rodriguez
14.00 Herensia:	Nuchi ku De
15.00 BAPA:	Duo Mirasol
16.00 Herensia Korsou:	Inardo Guilberto (Buchi) Clemencia
17.00 Dokumental:	Desaster Natural
18.10 Herensia:	Nemencio (Bubu) Beaumont (Kunuku Di Sabana1)
19.30 Puerto Latino:	Luis Zárraga
20.00 Herensia:	Edwin (Eddy) Frans
21.00 AkiBoneiru:	Farid Ayubi i Amancio Batta
22.00 Herensia:	Jose Antonio Martis
23.00 BAPA:	Ronald Pablo Hoyer

Tur mèrdia 12'or ta kuminsá un programashon nobo di 4 ora. E programashon aki ta ripití pa 24:00.



Leon Bérénos den trahe afrikano



Leon Bérénos, un persona ku amor i pashon pa historia, a presentá den trahe afrikano pa atendé e aktividat di konmemorashon 160 aña di sklabitut na Aruba djasabra. Leon ta spesialisá den konosementu di historia di barío San Nicolas. Kolaborador di FuHiKuBo na Aruba.

Ku por lesa riba un dia

Twitter ta limitá kantidat di 'tweet'

KRALENDIJK -- Twitter a stipulá un límite di e kantidat di 'tweet' ku usarionan por lesa. Segun bas di Twitter, Elon Musk, esaki ta nesario pa laga e plataforma drai bon i ta trata di un medida di emergencia temporal.

Segun Musk, e asina yamá 'scraping' ta un problema grandi pa Twitter. Aki nan empresanan usuario ta usa software pa warda data outomatisá riba Twitter pa e desaroyo di modelonan pa inteligensia artifisial. Esaki por kondusí

ku Twitter ta bira lento, òf ta bira inkonfiabel.

Desde awor usarionan ku un kuenta verifiká p'esei por lesa te 10 mil mensahe pa dia. Hendenan ku traha un kuenta nobo, por mira solamente ainda 500 mensahe. Hendenan ku tin hopi tempu riba e plataforma, por lesa 800 mensahe pa dia.

Anteriormente djasabra anochi Musk a bisa ainda ku ta trata di seis mil, 600 i 300 mensahe i ku lo riba término kòrtiku lo oumentá esakinan na 8 mil, 800 i

400.

Esaki ta un kontinuashon di e medidanan ku Musk a anunsiá djasabra anochi. E momentu ei el a bisa ku mensahenan riba Twitter ainda ta solamente pa esnan ku ta konektá riba e plataforma. Esaki tambe ta un medida di emergencia ku a tuma, pasobra tin hopi organisashon ku di un manera agresivo ta chupa informashonnan di Twitter. Dor di limitá e aksesio, e mionario ta spera ku e kuentanan outomatisá di Twitter lo keda ménos bishitá.



Komo hefe di Kuerpo Polisial suplente

Ronald Zwarter ta tuma despedida

KRALENDIJK – Dia 14 di ougùstùs Ronald Zwarter ta pasa su tareanan komo hefe suplente i hefe di operashon di Kuerpo Polisial Karibe Hulandes, KPCN,

pa su sucesor.

Zwarter a kuminsá su karera promé di òktober 2019 for di 'Eenheid leiding Noord-Nederland' i promé di òktober 2023 ta

regresá serka Polis Nashonal na Hulanda, despues di un periodo di 4 aña. Despues di esei, na komienso di 2024, e lo baha ku un penshun bon meresí na edat di

66 aña i despues di un kareera di 45 aña na polis.

Den e añanan tras di lomba, huntu ku e tantísimo koleganan den KPCN, a hasi e organisashon mas fuerte, independiente i ku mas enfoke riba partnernan di kadena i ku mas enfoke riba futuro. Algun tim spesialisá a originá, manera e tim di reshèrshi digital, e tim di krímen sibèrnetiko i e tim di FINEC. Ademas e organisashon di inteligensia a bira mas grandi i mas profeshonal i ta afiliá na Interpol i e ret di FCI.

Huntu ku algun kolega di KPCN, Zwarter a forma e base pa e sentro regional di informashon i ekspertisio, RIEC-CN, ku ta hunga un ròl importante den e kolaborashon entre partnernan di kadena i e aserkamentu di soborno i labamentu di plaka.

Hopi kolega lokal a krese bai den diferente funshon den kuerpo ku ta motibu ku esaki a bira mas duradero i mas independiente. Banda di esaki, den e 4 aña tras di lomba práktikamente a komponé hinter tim di maneho, inkluso e direktiva di kuerpo, di nobo

na unda e, entre otro a duna forma na e traspaso i guia. Ku esaki e kuerpo ta kla pa futuro i ta bon pará pa tantu Karibe Hulandes komo pa e region di Karibe.

E bon relashon i kolaborashon entre koleganan polis i Zwarter, a kondusí na e éksitonan aki i pa e motibu ei e tabata un periodo bunita pa loke ta trata e desaroyonan denter di KPCN.

Tokante esaki Zwarter mes ta bisa: "Hopi biá mi ta bisa, talento ta tur kaminda. Huntu ku koleganan di KPCN i di diferente partner di kadena, a hasi adelanto grandi i mi ta kontentu ku mi a kontribuí na esaki. Hopi biá ta balotá e kompleksidat di e área di Karibe, pa e motibu akí e añanan benidero lo mi keda optenibel pa koleganan i diferente ministerio pa for di Hulanda mi sigui kontribuí na desaroyo den e region akí.

Tabata un periodo bunita i instruktivo p'ami i pa mi kasá, dor di kua semper nos lo keda kòrda bèk ku melankolia riba e koleganan i e islanan, ku awor ta mas será ainda den nos kurason."

SGB ku komishon tokante pasado di sklabitut

KRALENDIJK – Komunitat di Skol Boneiru, SGB, a forma un komishon tokante pasado di sklabitut kaminda tur unidat di skol ta forma parti.

E meta no ta solamente

pa reflehá riba pasado di sklabitut durante un solo dia, pero pa organisá diferente aktividat durante e aña eskolar benidero kaminda huntu ku tur estudiante ta reflehá riba e tópiko

akí. Komo institushon edukativo ku ta trata di eduká estudiante riba tereno internashonal, e komishon ta haña importante pa reflehá riba e tópiko akí riba e dia aki, asina komishon a bisa.



E komishon ke organisá vários aktividat rònt di e tema den transkurso di aña.


Despues di 16 aña

Marlon Bermudez ta bandoná e sektor notarial

KRALENDIJK -- Entrante promé di yüli Marlon Bermudez no ta forma parti mas di e tim di Notario Rispens. Dia 16 yüli 2007 el a kuminsá laborá na ofisina di notario Mr. Maarten Maartense i tabata enkargá ku e parti di atministrashon. Na mart 2011, Notario Maarten Maartense a fayesé i e ofisina a keda remplasá pa Notario Aniek Schouten i Bermudez a sigui laborá den e mesun funshon. Na sèptèmber 2022, Notario Aniek Schouten a dis-tansiá su mes komo Notario

i a pasa esaki pa Notario Robin Rispens, kende a tuma e funshon i aki tambe Bermudez a kontinuá den e mesun funshon. Mirando e trayekto laboral di Bermudez den e sektor notarial i a laborá pa tres diferente Notario i esnan ku a konosé sa ku semper el a ehersé su trabou ku e mesun amor i dedikashon. Pa algun aña kaba Bermudez a establese su propio kompania di atministrashon konosí komo Easy Accounting & General Services B.V.

Segun añanan ta pasando, Easy Accounting a krese den klientela i Bermudez a tuma e desishon pa bandoná e sektor notarial pa e por brinda su klientela un mas mihó servisio. Bermudez ta bai hasi hopi falta den e sektor notarial, pero ta keda brinda su klientela su servisio ku su ekspertisio tantu riba e tereno di atministrashon i notarial, pero awor ku su propio empresa. Nos ta deseá Bermudez tur klase di éksito ku su propio empresa.



Trahadó ku motor di avion a chupa a kometé suisidio

KRALENDIJK/TEXAS – Manera publiká anteriormente, e siman ku a pasa un trahadó di aeropuerto di e aeropuerto di San Antonio na Texas a muri despues ku motor di un avion a chup'è. E investigashon i outopsia a tuma lugá i awor a demostrá ku ta trata di un kaso di suisidio, na lugá di un aksidente tráfiiko manera tabata pensa anteriormente. Debí na e konklushon,

National Transportation Safety Board a disidí di stòp ku un investigashon amplio, ku a anunsiá anteriormente. Segun e deklarashon, no a konstatá problema operashon di siguridat ku e avion òf ku e aeropuerto. E víktima, David Renner, di 27 aña tabata un trahadó di plataforma pa Unifi Aviation, un kompania ku Delta ta hür pa ser-vionan di plataforma na e aeropuerto di San Antonio.



VACANCY Marketing Coordinator

Are you a creative and results-driven marketer with a passion for the hospitality industry? Join our dynamic team as a Marketing coordinator and make an impact on our brand presence and revenue growth. As our Marketing coordinator, you will have the opportunity to show your strategic thinking, innovative ideas, and drive our marketing initiatives to new levels. With your high energy, enthusiasm, and commitment to quality, you will play a crucial role in attracting guests, promoting our Resort, and enhancing the overall guest experience. Join us and be part of a team that values creativity, collaboration, and dedication!

Key Responsibilities:

- * Develop and implement strategic marketing plans to drive brand awareness and revenue growth
- * Create digital marketing campaigns, including improving our rankings, email marketing, and social media
- * Manage the creation and execution of captivating content for various marketing channels
- * Conduct market research and analyze consumer trends to identify new opportunities
- * Collaborate with internal/external teams to ensure consistent brand messaging and alignment
- * Stay updated on industry trends and competitor activities to maintain a competitive edge
- * Keeps management informed by submitting activity and results reports, such as call reports, weekly work plans, and monthly and annual territory analyses.

Qualifications:

- * Preferable HAVO /VWO or a degree in Marketing, or a related field or equivalent experience
- * Experience in the hospitality industry is a plus
- * Knowledge of digital marketing strategies and tactics
- * Analytical and problem-solving skills
- * Excellent written and verbal communication abilities
- * Creative mindset with an eye for design and branding
- * Knowledge of marketing software and analytics tools
- * Ability to collaborate effectively with cross-functional teams

To apply or for more information, please send an email to hr@habitatbonaire.com

Popularidat ta relativo
P'esei un propio estilo
No solamente pa ta eksitoso
Sino sigur mas balioso

Brò KèS 93.5 FM
pokopoko pero sigur mas i mas hende ta ...

Skuch'è
Telefon/ WhatsApp +599 701 0935
www.radio935bonaire.com

Durante konmemorashon na Amsterdam djasabra

Esküs di Rei risibí ku aplouso fuerte

KRALENDIJK – E esküs ku Rei Willem Alexander a ekspresá djasabra na Amsterdam, Hulanda, pa e papel ku Hulanda a hunga den negoshi transatlántiko di katibu siglonan pasá, a keda risibí pa un aplouso fuerte pa e hendenan presente. Esaki a sosodé durante konmemorashon di abolishon di sklabilitut den Oosterpark.

Rei Alexander a bisa: “Nos ta karga e krueldat di pasado di sklabilitut huntu ku nos. Te awendia por sinti esaki den rasismo den nos komunidat. Riba dia 19 di desèmber aña pasá minister-presidente, na nòmber di gobièrnu, a ekspresá esküs pa e echo ku den nòmber di estado hulandes siglonan largu a hasi hende merkansia, a eksplotá i maltratá nan.”

“Awe mi ta pará aki dilanti boso komo boso Rei i komo parti di gobièrnu mi ta ekspresá e esküs aki

mi mes. Mi ta biba esaki ku alma i kurason den forma intenso. Pero pa mi e tin bada di esaki un otro dimenshon personal. Negoshi di katibu i sklabilitut ta rekonosé komo un krimen kontra humanidat. E stadhoudernan i i reinan di Kas Oranje Nassau no a tuma ningun akshon kontra esaki. Nan a aktua dentro di e kuadro di loke e tempu ei tabata konsiderá legalmente aseptabel. Pero e sistema di sklabilitut a ilustrá e inhustisia di e leinan ei.”

Di akuerdo ku Rei Willem Alexander, Segundo Guera Mundial a siña nos ku bo no por skonde bo mes te ekstremo tras di e lei na momentu ku ta redusí bo próhimonan na bestia i entregá nan na arbitrariedat di esnan ku tin poder. Na sierto momentu e obligashon moral ta krese pa aktua. Mas aun e echo ku sklabilitut den Hulanda Oropeo tabata prohibí.



Rei Alexander: “Loke den e kolonianan i den komèrsio ultramar tabata haña normal i ku tabata praktiká i enkurashá na eskala grandi, no tabata pèrmití aki. I esaki ta hasi doló.”

Segun Rei Willem Alexander, e investigashon independiente pa kua el a di-

sidí lo tira mas lus riba e ròl presis di Kas di Oraño den historia kolonial i sklabilitut. “Pero pa e opvio falta di aktua aki kontra e krimen aki kontra humanidat mi ta pidi dispensa i pordon.”

“Mi ta realisá mi mes masha bon ku sigur no ta tur hende tin mesun sintimentu na e konmemo-

rashon aki. Tin tambe habitantenan di Hulanda ku ta haña pidimentu di esküs asina tantu tempu despues di abolishon di sklabilitut eksagerá. Sinembargo den mayoria grandi nan ta sostené sí e lucha pa igualdat di tur hende, sin distinsion di koló òf background kultural.”

Un enkuentro hopi spesial na Hulanda



Djasabra Bòi Antoin tabatin un enkuentro hopi spesial. El a topa ku Leonardo Semeleer, ku meskos kuné, ta desendiente di e katibu di Shon Leonardus Bernardus Antoin, kasá ku Margaretha. E famia aki ta bini di Benedicta Antoin, yu di Leonardus, ku a kasa ku Pedro Semeleer.

Reflekshon di Siman

PORDON

Efesianan 4:32 “I sea kariñoso ku otro, misericòrdioso, pordonando otro, meskos ku Dios den Cristo tambe a pordoná boso.”(BS)

Bo no a ripará, ku e persona ku a ofendé nos, hasi nos doló, traishoná òf a humiliá nos, ta nèt e persona ku nos ta mas tempu kuné den mente?

Anochi e ta den nos mente, nos no por pega soño pasobra e ta molestiá nos pensamentu i mainta tempran até ei. Ta manera ku nos tin e persona su man tené, tur kaminda ku nos bai.

Si bo rekonosé bo mes den e deskripshon ariba menshoná, ta un indikashon ku ainda tin persona ku bo mester pordoná. Un di e definishonnan di pordoná ta: “liberá òf lòs laga bai”. Ta netamente loke nos tin mester pasobra literalmente e persona ta mará na nos. Mas nos pensa e asunto, mas profundo e doló i mas grandi e rabia ta bira.

Awe e versíkulo ta siña nos pa pordoná otro, meskos ku Dios a pordoná nos den Kristu. Tur hende ta hasi piká, ami i abo tambe. Awor si Dios ta pordoná nos, pakiko nos no por pordoná otro?

Mi no ta papia aki di algu fásil, pero si mashá nesario. E ta un desishon propio i boluntario ku un resultado sumamente bunita. Falta di pordoná ta hasi nos bida zür i komo resultado nos trato na otro persona tambe ta zür. En kambio pordon ta laga e persona lòs i ta liberá nos. Esei ta yena nos ku pas, amor i kariño den nos papiá i den nos hasí. E siman akí skohe pa pordoná i lòs laga bai!

Pordon no ta kambia bo pasado, pero e ta transformá bo presente!

Miralda Paula-Frans

Produkshon PGM

A topa ku Kendra Sirak i Jay Haviser

KRALENDIJK – Durante nan estadia na Boneiru resientemente dr. Kendra Sirak i dr. Jay Haviser a topa ku FuHiKuBo i Bonai. E enkuentro a tuma lugá na museo di Chon i Norma Theodora na Antriol. E dos personanan aki ta konduciendo un investigashon tokante DNA di habitantenan original di Boneiru, indígena, amerindio, den relashon ku Karibe i e kon-

tinente amerikano.

Haviser a splika na e okashon ei kon importante e investigashon ta. Asina por haña un bista di kon e hendenan indígena a move den pasado pa i for di Boneiru. Pa hasi e DNA ta hasi uso di pidanan di wesu na kabes di restunan di hende ku a haña banda di SGB algun aña pasá.

Dr. Kendra Sirak ta un eksperto den e tipo di in-

vestigashonnan aki. E ta di Harvard University. Haviser a hasi diferente ekskavashon arkeológiko na Boneiru, último huntu ku arkeólogoan di Univer-sidat di Leiden. For di su promé investigashon a sali e buki ‘The First Bonaireans’.

Gezaghebber Nolly Oleana i su esposa Ann tambe tabata presente i a hasi vários pregunta.



Konmemorashon sklabitut





Bario Festival den Nikiboko

KRALENDIJK -Tour- Angel ta organisá e di dos
ism Corporation Bonaire Bario Festival ku lo tuma
(TCB) i SoftballTeam New lugá den bario di Nikiboko.

E evento ta tuma lugá riba djasabra 8 di yùli 2023 den un tremendo ambiente estilo 'Vakantie Vibe' for di 6'or di atardi te 12'or di anochi.

E programa ta kargá ku músika i tin stènt ku ta bende kuminda lokal. E agrupashonnan musikal Grupo NikiMix i Foyan boys ta presente pa animá e anochi akí. Pa duna e Bario Festival un toke mas spesial lo tin presentashon tambe di S.P.A.B Dance, músika di DJ Fe i hopi mas. Entrada ta kompletamente grátis. TCB i SoftballTeam New Angel kier a ekstendé un invitashon na pueblo di Boneiru i tambe na tur nos

Eli Deli Cafe B.V.

ta buska
BARISTA

- 40 ora pa siman
- idioma: spaño, ingles i papiamentu.
- min 3 aña di eksperensia,
- edat min 25-max 35.

Pa mas info yama telefon **795 4709**

Eli Deli Cafe B.V.

ta buska
KEUKEN HULP

- 30 ora pa siman
- idioma: spaño, ingles i papiamentu.
- min 3 aña di eksperensia,
- edat min 25-max 35.

Pa mas info yama telefon **795 4709**

TCB & SOFTBALL TEAM NEW ANGELS PRESENTS TO YOU:

BARIO FESTIVAL
Vacation Vibes Edition

DATE: JULY 8TH, 2023
TIME: 18:00 - 00:00
PLACE: PARKE LALAN CLARENDA | NIKIBOKO
FREE ENTRANCE

LIVE ENTERTAINMENT
★ NIKIMIX ★ FOYAN BOYS ★ S.P.A.B. DANCE ★ DJ FE ★

LOCAL FOOD AVAILABLE

bishitantenan pa bin pasa e di dos edishon di Bario un ratu ameno huntu ku nos Festival ku ta bai tuma lugá riba djasabra 8 di yùli den den e bario di Nikiboko.

Entrega diploma FM Academy

Djabièrnè 30 di yùni Fundashon Mariadal Akademia a entregá diploma na su graduadonan.

Un grupo di 14 studiante a risibí nan diploma den presensia di nan famia. Ta trata aki di studentenan ku a terminá e estudio di Kuido nivel MBO 3 i estudio Enfermeria MBO nivel 4. E potrèntan ta duna un impreshon di e evento sumamente importante pa e studentenan.



DEN PASONAN DI BÒI

E rúbrika aki no ta kos di tur dia den BONERIANO. Ta ora mi tin tempu, gana i tópiko pa skirbi ariba e ta sali. E tres elementonan aki ta hunga un ròl den sali-mentu di e rúbrika aki. E ta mas tantu un kos pa tene mi okupá, pa no lubidá e arte di skirbimentu. Tene tambe e dedenan fleksibel. Tene e tinu bei, purba pa no kai den ripitishon.

Na momentu ku mi ta skirbi e kolumna aki mi no ta na Boneiru. Na momentu ku e ta sali, pues awe djaluna, mi ta bulando riba un buelo di KLM pa Boneiru. Mi a risibí un invitashon di parti Ministerio di BZK pa asistí na konmemorashon di 160 aña di libertat di tur katibu den e anterior kolonia hulandes. E konmemorashon a tuma lugá djasabra den Oosterpark, Amsterdam, ku asistencia di Rei Willem Alexander. Na e okashon ei el a pidi diskulpa pa tur loke Hulanda a hasi, kreando un komèrsio i transporte transatlántiko di hende afrikano komo katibu den e kontinente afrikano. Naturalmente un akto repudiabel i kondenabel.

Nos por grita kiko ku nos ke, pero el a sosodé. Finalmente na 1863 Hulanda a haña su mes fòrsá pa abolí sklabilitut. Ta kuestionabel kon e periodo di abolishon di sklabilitut. A laga e eks-katibunan desampará, pa nan kuenta, sin pariba, sin pabou. E hendenan aki a haña nan mes ta sigui traha, hasiendo mesun trabou, pa komersiantenan Neuman, Hellmund, Jessu-

run, despues otronan manera Debrot, Hart, Herrera, Boom, Muskus, ku a sigui operá e kunuku i saliñanan ku a forma parti di e anterior plantashi di gobièrnu.

Loke a sosodé, á sosodé. Nos no por kambia historia. I nos no por suavisá loke a sosodé. E tabata grave, serio, repudiabel i kondenabel. Realisá tambe ku no ta solamente e negoshante di katibu tabatin falta, sino nos antepasadonan na Afrika tambe, ku tabata bende afrikanonan ku e negoshante. Por yama nan enkubridó òf mi no sa kiko mas. E parti di historia aki no ta bini masha dilanti, pero ta loke a sosodé. Mester duna e historia kompletu i na manera ophetivo.

Hulanda a usa tur sorto di forma pa ekstendé e periodo di sklabilitut mas tantu tempu posibel. Miéntras ku paisnan manera Fransia i Inglatera a abolí sklabilitut for di masoméno 1800 kaba bini ariba, Hulanda a hasi esaki te na 1863 numa. No a kompensá e katibunan finansieramente na momentu ku nan a bira

liber. Sí Hulanda a paga e doñonan partikular di katibu finansieramente ku 200 florin pa katibu. Famia Boyé a sali komo hende riku for di sklabilitut, mirando kuantu katibu nan tabatin na 1863 ora ku abolishon a drenta na vigor.

E pueblo boneriano no sa gusta asosiá su mes ku sklabilitut òf afrikano. Si ku indjan, e poblashon indígena, di e isla aki. Pero realidat ta siña nos, pa medio di entre otro tètstnan di DNA, ku mas i mas hende ta laga hasi awendia. Nan ta mira ku den nan DNA tin porshonnan grandi afrikano, hende indígena (indjan/amerindio) i hende blanku. Inevitabel.

Laga tuma mi mes komo ehèmpel. Sin mester a hasi un tètst di DNA ainda, a base di mi mes investigashonnan, mi sa ku den mi DNA tin rastronan afrikano i oropeo. Pero tambe tin rastronan di e amerindio indígena. Mi bisawelo di parti tata por ehèmpel tabata un katibu ku a haña su libertat djis promé ku a abolí su sklabilitut. Su doño, Felix

Anthony, a fayesé i e kati- bunan den su 'boedel' a bira liber. Mi welo tabata Leonardus Bernardus Antoin, yu di Petrona Bough, katibu di famia Boyé. Bough, meskos ku Booi, ta famnan deribá di e fam Boyé, pues di nan doño.

Di otro banda, mi mama ta nietu di Ernst Barend Ferdinand Hellmund, segundo generashon di Hellmund kua bini for di Aschersleben, Alemania. E promé Hellmund ku a yega Kòrsou na fin di siglo 18 (1792) tabata un 'landschirurgijn', un médiko. Shon Ernst tabata un di e komersiantenan ku a kumpra dos parsela grandi (Bolivia i Colombia) ku gobièrnu di Hulanda a bende públikamente dia promé di sèptèmber 1868, na momentu ku nan a ripará ku no por a sigui operá Boneiru mas komo plantashi sin katibu.

Mas aleu por ripará ku mi tata a nase i lanta na Nort di Saliña. Di mes tin sanger indjan a kore den su benanan. Serka mi wela di parti mama tambe por mira karakterístikanan ku ta reda desendensia indjan. Mi tin foto di dje ku ta mustra e laso aki.

Mi ke rekomendá tur hende


pa investigá nan palu di famia i siña konosé nan rais, buska pa sa di unda bo ta bini. Lo bo topa ku sanger oropeo, afrikano i indjan, ku a hasi bo ta loke bo ta awe. Mi mensahe ta pa nos stòp di husga otro a base di koló i rasa. Den DNA di esun ku ta yama su mes boneriano outéntiko awe tin tur sorto di rasa skondí..

E echo ku mi ta na Hulanda awor aki tin di aber ku e trabou hasi riba spesialmente reskate di nos historia oral. Esei mi ta sinti den tur kombersashon ku mi tabatin e último lunanan ku hopi minister i ámtenar haltu di Hulanda Oropo ku a bishitá FuHiKuBo. Esei ta resaltá komo mi 'levenswerk'. Pues papia ku hende grandi riba nan bida i e Boneiru di ántes. Ningun otro isla di Karibe Hulandes i Hulanda Karibense no por igualá Boneiru den esaki. I esei ta hasi ami i tur hende rondó di mi orguyoso. Nos ta satisfecho di tin entrevista wardá di alrededor di sinku mil persona, repartí den e programanan Herensia di Siglo 20, Herensia, Boneiru Ayera pa Awe, Aki Boneiru, programa radial Beku i alrededor di 20 dokumental pa televishon.

MONCHI & TONCHI

M21 tabatin bunita akshon pa piki sushi ayera na nort di saliña.

Awèl si, pero lider no a shusha man, tabata keiru na tera friu.



KOLOFÓN

Editor: Bonaire Communication Services N.V.
Kaya Irlanda 12,
Tel. 717-8482
Redakshon: extrabon@gmail.com
avisobon@gmail.com
Wèpsait: www.extraboneiru.com
Facebook: Extra Boneiru

Direktor
Shirley Martis
785-3824
796-3824

Partner na Aruba
Awe Mainta
Partner na Kòrsou
Extra
Partner na Boneiru
Live99

Redakshon
Papi Antoin
Nathaly
Evertsz-Ipcedencia
Velli Gijsbertha
Edson Pietersz
Ibi Piar (deporte)

Layout
Maya Beaumont

Konsehero:
Bòi Antoin
786-6818
Aviso
avisobon@gmail.com

Di Diestres Djadumingu Siklo A

Promé Lektura : 2Reinan4, 8-11. 14-16a

Salmo : Salmo 89, 2-3. 16-19

Di dos Lektura : Romanonan 6, 3-4. 8-11

Evangelio : Mateo 10, 37-42

Eliseo tabata un di e profetan grandi di Tèstament Bieu, meskos ku Elías, su predesor i maestro. Dios a konsedé na Eliseo, mesun kos ku El a hasi ku Elías, e don di hasi milager.

Den kapitulo kuater di e di Dos Buki di Reinan, for di kua a saka e promé lektura di awe, ta konta un serie di nan.

Dos tabata skirbí na fabor di un muhé sunemita, di e region di Sunem, unda e profeta tabata kustumbrá di pasa ora e tabata bishitá e komunidadan israelita.

E muhé ei, maske e no tabata hudu, tabata tin kurason grandi, i mirando ku Eliseo tabata un berdadero hòmer di Dios, a invit'è pa kome. Despues el a papia ku su es-

poso pa nan laga traha un kuartu chikí p'e den nan kurá di kas. Ei den e profeta tabata sosegá kada be ku e bishitá nan.

E promé milager tabata pa anunsi'è ku e lo bai haña un yu, maske ku su esposa ya tabata bieu. Despues, ora e yu a muri siendo ya un mucha hòmer, e muhé, kibrá di doló a buska Eliseo, i esaki a logra ku Señor a rebibá e yu, pa felisidat di su mama.

Den esaki a ser kumplí loke Hesus ta bisa den e Evangelio, di ku esun ku risibí un profeta lo risibí rekompensa di profeta.

E bon ku nos hasi semper ta proporshoná nos e satisfakshon di a kumpli ku nos deber i Dios, ku sa tur kos i ku



konosé e intenshonnan ku kua nos ta aktua, lo premiá nos den forma generoso.

Pero e regalo di mas grandi di Dios, manera san Pablo ta rekordá nos den e di dos lektura, saká for di su karta na Romanonan, ta ku nos a muri ku Kristu pa resusitá kunE.

Esaki tabata loke a sosodé riba dia di nos boutismo. Risibí e sakramentu akí ta nifiká muri pa resusitá.

Esaki a ser ekspresá, muchu mas kla, den e rito ku kua tabata selebrá boutismo den promé tempunan. Miéntas e obispu i fielnan tabata keda den misa, esnan batisá i e ministro nan ta trasladá nan mes pa e baptisterio. Esaki tabata ser hasi general anochi i ku tiki lus. Einan e novisionan tabata drenta den un sorto di pisina chikí, kompletamente sunú, i ora nan yega mei mei di dje, despues di a afirmá nan fe den Dios un i trino, nan ta bai tres be kompletu bou di awa. E baimentu bou di awa akí tabata figura di morto pa bida di piká, pa renasé na un bida nobo ku Kristu. No laga nos lubidá loke Hesus a bisa Nicodemo, e magistrado hudu akí ku a bishit'è den sekreto: "niun hende no por drenta reino di Dios, si e no nase di awa i spiritu" (Huan 3, 5).

E rito mes e baimentu bou di awa tabata simbolisá. Tabata laga atras e individuo pekadador pa kuminsá na ser un kriatura nobo.

Esaki tabata enserá un kompromiso masha serio, di kua e evangelio di awe ta papia ku nos. Esun ku batisá mester ta dispuesto na krese den bida nobo di e Spiritu, siendo un berdadero imitadó di Hesus.

Di einan ku e mester karga su krus, esun propio, no esun di Kristu, i siguiÉ.

No ta poko esnan pa kende ta resultá ekstremadamente difísil e siguimentu di Kristu, ya ku nan tabata ke pa

e krus lo tabata muchu mas fásil pa karga. Ora atraé pa e plasernan fastioso ku mundu ta ofresé, nan ta tira e krus un banda i ta apartá nan mes di Hesus, nan ta manera susidando na mes spiritualmente.

Esaki ta loke Hesus ta bisa nos ora E afirmá: "Esun ku konserv'è su biba, lo pèrdè; pero esun ku pa mi kousa riska pèrdè su bida, lo konserv'è".

E ekspreshon "konserbá bida" ta nifiká aktitut di esnan ku ta kere ku nan a deskubrí e sekreto pa disfrutá e bida akí, aunke esaki ta nifiká apartá nan mes di e kaminda di Dios, dedikando nan mes na adorá diosnan falsu, di plaser di plaka i poder ku tantu ta atraé nos tur.

E problema ta, manera Hesus ta atvertí nos, ku di e forma akí nos lo pèrdè e berdadero bida, pues ora nos apartá nos mes di Dios, nos lo ta kanando riba e kaminda ku ta konduzí nos na perdishon eterno.

Kristu ta eksigí di nos, ku si nos ke ta su disípulo, pa nos pone E riba tur kos.

Ningun persona, ni mama, ni tata, ni esposa, ni yunan, ni amigu, por okupá e promé lugá den nos kurason. Den E i úni-

kamente den djE nos lo haña salbashon. Si nos apartá nos mes di djE nos lo pèrd'è determinadamente.

Esaki ta, presis, loke san Pablo a bisa nos den e Karta na Romanonan. Ora ku nos batisá, ta manera ku nos a muri i ta derá huntu ku Kristu Hesus.

Si despues di a risibí bida nobo den e Spiritu, nos ta empenhá pa sigui otro kaminda, ta lógiko ku òf nos no a komprondé e berdadero nifikashon di e bida akí òf nos ta siegu pa mira ku e kaminda riba kua nos ta kana ta hiba nos na un final di spantu.

Esaki ta tambe e kompromiso ku mayornan ta hasi ora nan ta pidi boutismo pa nan yunan. Si nan mes no ta bibando komo kristian berdadero, nan lo no por ta ehèmpel pa nan desendiente, sino tur lo kontrali.

No ta straño ku nos ta mira kon hopi ku a ser batisá komo mucha, ta biba un bida total di pagano. Ta mira ku e mayornan no a kumpli ku nan obligashon. I di esaki mester duna kuenta na Dios, pues lo ta preferibel no pidi boutismo pa e yunan promé ku bira responsabel di no a eduká nan den e fe i amor pa Dios i pa e próhimo, manera lo ta nan obligashon.

E nòmbernan di Eukaristia

Eukaristia ta di tal profundidat i beyesa ku den transkurso di tempu na e misterio eukarístiko nan a yam'è ku vários nòmber:

Kibramentu di pan, kaminda ta parti, ta repartí i ta kompartí e pan di shelu, komo alimento di inmortalidat.

Santo Sakrifisio de la Misa, kaminda Kristu ta sakrifiká i ta muri pa salba nos i duna bida na nos.

Eukaristia, pasobra e ta e akshon di grasia dor di e antónomasia ku Hesus ta ofresé na su Tata selestial, den nos nòmber i di hinter Iglesia.

Selebrashon Eukarístiko, pasobra nos ta selebrá e akshon divino akí den komunidad.

Santu Misa, pasobra eukaristia ta kaba den mandamentu, den mishon, kaminda nos ta komprometé nos mes na hiba na otronan e salbashon akí ku nos a risibí.

Misterio Eukarístiko, pasobra ta dilanti di nos wowonan ta realisá e gran misterio di fe. Promé di kuminsá na papia di e misterio akí tin di puntra e dikon di eukaristia, dikon Hesus a instituí e sakramentu atmirabel akí, dikon E tabata ke a keda entre nos, ku nos, pa nos, den nos; kiko a mov'è pa hasi e milager asombroso akí ku nos no por ni mester kustumbrá. O, asombroso misterio di fe! Dikon Hesus tabata ke hasi presente e sakrifisio di Krus, manera si no tabata basta riba Bièrnè Santu den kua Ela duna nos tur su sanger i a logra pa nos tur e grasianan nesario pa salba nos?(((

E kontesta na e pregunta akí ta Hesus so sa esaki. Únikamente nos por vislumbrá algun intuishon i idea. Ela keda pa amor ekseksivo pa nos, nos lo a bisa pa lokura de amor. E no tabata ke laga nos keda nos so, ta p'esei Ela bira nos kompañero di kaminda. Ela mira nos ku hamber spiritual, i Kristu a duna nos esaki bou di e espesie di pan ku na tempu ku ta kumpli i kalma, tambe e ta habri e hamber di Dios, pasobra e ta stimulá e apetit pa un bida nobo: e bida di Dios den nos. El mira nos asina deskurashá, ku E tabata ke animá nos, manera Elías: "Lanta i kome, Bo tin un biahe largu bo dilanti" (1 Rei 19, 7).

Tur loke bo mester sa tokante Sínodo di Sinodalidat 2021-2024

Den òktober 2023 i òktober 2024, e Sínodo di Obispanan lo reuni den su XVI Asamblea General Ordinario, pa trata e tema '**Pa un Iglesia sinodal: komunión, partisipashon i mishon**', a aviso di **papa Francisco**.

Sinodalidat, e "kana huntu", ta un punto fundamental pa Francisco, ku a manifestá hopi biaha a importansia di ku e konhunto di Iglesia (Papa, obispanan, saserdotenan, religiosonan i laikonan) ta avansá huntu i y de la mano: "**E kaminda di sinodalidat ta e kaminda ku Dios ta spera di e Iglesia di terser milenio**. Mi ta kombensí di ku, den un Iglesia sinodal, tambe e ehersisio di e promé petrino lo por risibí muchu mas lus".

Den un metodologia publiká introdusí pa Francisco, e proseso sinodal a kuminsá den òktober 2021, ku un fin di siman di refleksionnan den Vaticano. Pero di

ei el a radiante na Iglesia universal: di òktober 2021 pa ougùstus 2022, a tuma logra e **fase diosesano**, pa e trabounan di parokianan i diósesis; di òktober di 2022 pa mart 2023, e **fase kontinental**, pa e trabounan di e Konferensianan episkopal.

Di **4 pa 29 di òktober 2023** lo tuma lugá den Vaticano e Asamblea General di Papa ku obispanan di henter mundu, i lo kontinuá den òktober 2024. Pa promé pa biaha den historia di Sínodonan, e muhénan lo vota riba loke a papia den e enkuentro vaticano. E Instrumentum laboris lo guia e trabounan di e tatanan sinodal a ser publiká dia 20 di yùni 2023.

Finalidat di Sínodo di Sinodalidat ta **skucha henter Iglesia i haña métodonan ku ta fasilidat na hiba e konsepto akí "sinodalidat" di den práktika**.

STATIA/SABA/ST. MAARTEN

Kambio dinámico direktiva di supervishon WINAIR

SIMPSON BAY – WINAIR ku orguyo ta anunsiá e logro signifikante riba su kaminda pa resiliensia i éksito. Siguiendo e sobrevivensia remarkabel for di retonan finansiero, orkan i e pandemia global di Covid-19, WINAIR ta pre-

parando pa ekspanshon i prosperidat pa futuro. Ku orguyo WINAIR ta anunsiá e ekspanshon di su direktiva di supervishon di tres pa sinku miembro, markando un era nobo di desishon stratégiko i kresementu.

Desde 10 di òktober

2010, momentu ku WINAIR a bira di Gobièrnu di Sint Maarten, ku base ofisial na e pais, e kompania di aviashon a pasa dor di un transformashon remarkabel. Inisialmente konfrontá ku opstákulo, WINAIR a sobreviví na 2021 bou di

lider di e direktiva di supervishon konsistiendo di George Greaux Jr., Robert Budike, Gerrit Draai i e tim di manager ehekutivo dediká. A base di nan esfuerso inkansabel i kompromiso, WINAIR a krese dentro di un año. Awor momentu ku

WINAIR ta drenta e fase di ekspanshon i oportunitadnan di kresementu, ta krusial pa adaptá su liderazgo struktural. E ekspanshon di e direktiva di supervishon pa sinku miembro, ta un paso stratégiko pa dilanti pa e kompania.

Entrega yabi fase dos Under the Hill

THE BOTTOM – Seis futuro famia di e kasnan nobo di Under the Hill djárason durante un seremonia kòrtiku, a risibí simbólikamente yabi di nan kas.

Diputado di bibienda, Eviton Heyliger, a dirigí su mes na esnan presente, inkluyendo representantenan di Entidat Públiko Saba, e korporashon di bibienda Hulandes, Bazalt Wonen, kompania di konstrukshon prinsipal, Van Boekel, e fundashon lokal di bibienda, Own Your Own Home i servisionan di emergensia.

Heyliger a duna un historia kòrtiku di e fase dos di e proyekto di kas di Under the Hill. “E trabounan di kobamentu a kuminsá na òktober 2018 i awor na 2023 por mira e resultado. Mi a kuminsá traha komo direktor di e departamentu di kas sosial na 2016, loke ta nifiká ku mi tabata ku e proyekto akí for i hopi komienso i kaminda awor mi ta kontentu di mira su final,” Tabatin hopi spekulashon den komunidat riba kon e proyekto tabata bayendo i a tempu tuma.

Tene na mente ku apesar ku e trabounan a kuminsá



na òktober 2018 pero e forsa laboral mester a bini for di islanan i paisnan mas grandi den besindario i e materialnan mester a bini for di eksterior pa Saba, Heyliger a bisa.

Na 2020 e pandemia di Covid a dal. E proyekto tambe a sinti e efekto i mester a sufri kontra tempu. Apesar di tur kos, tras di kortina tur partido a kontinuá pa traha huntu i awe

nos ta mira e resultado, segun Heyliger.

Despues di e diskurso di e diputado, a hasi entrega di yabi simbólikamente na e seis habitantenan nobo.

APS ta nombra The Curaçao Financial Group komo gerente di invershon

PHILIPSBURG -- Algemeen Pensioenfonds Sint Maarten (APS), a nombra The Curaçao Financial Group N.V. (CFG) komo atministradó di e kartera di invershon. Entrante promé di mei gerensia di CFG a asumí e responsabilidat di maneho.

E kartera di invershon

lokal ta kontribuí na e misjon di APS, un fondo di penshun ku ta prepará pa futuro, ku ta invertí den i na nòmber di penshonado i partisipantenan.

APS ta di opinion ku e desishon pa traha huntu ku CFG, huntu ku un órgano atministrativo i metanan mehorá, ta duna mas di-

rekshon na e esfuersonan i asina agregá balor na APS komo akshonista.

E entidat ku ta ehekutá e tareanan di maneho di e kartera di invershon di APS, ta sigui bou di un nòmber nobo, Sint Maarten Investment Company B.V. (SMIC). Gerensia di SMIC ta konsistí di direktornan

general Walter Blijleven i Bharat Bhojwani i direktor ehekutivo Louisian Wathey.

Meta di SMIC ta pa reklutá, selektá, atministrá i vigilá invershonnan lokal di APS na Sint Maarten i Kòrsou. APS: “Kombinando ekspertisio di tantu Sint Maarten komo Kòrsou, nos ta enfoká nos mes riba fortifikashon i ampliashon di nos relashonnan ku interesadonan eksterno, klientenan i partnernan di invershon riba ámbos isla. Nos ta konvensí ku SMIC

den hopi sentido lo trese un kambio positivo.” APS ta enfoká riba un kombinashon di invershon ku no ta generá solamente un rendimentu saludabel pa e fondo di penshun i su partisipantenan, pero ta kontribuí tambe na desaroyo ekonómiko i sosial di e komunidatnan den kua APS ta aktivo.

Promé ku a tuma e desishon pa selektá tantu CFG komo señora Wathey, a tuma lugá un proseso intensivo di destaho i selekshon.



Jalvicar B.V. ta buska

- 1 airco-monteur
- 1 auto-lasser

-airco-monteur 3 año /auto-lasser 1 año di eksperensia

Mas inf. tel. nr. **717-3163**

HULANDA

Hulandes ta muri durante kareda di pia

HULANDA/OUSTRIA – Un Hulandes di 47 aña djasabra a muri durante kareda di pia na Tirol, Ou-

stria. El a sak den otro i kai, segun Polis. Dunadónan di ayudo a trata na reanimá e hòmber, pero sin resultado.

Komo ku ainda mester stipulá e orígen di e morto ku siguridat, Fiskal di Ministerio Públiko a pidi pa outop-

sia.

E hòmber tabata partisipando na Stubai Ultratrail, un kompetensia di kareda di pia den kua ta subi Stubai. E organisashon ta bisa di ta lamentá e sosiedu trágiko. Despues di e insidente a para e evento.

E kompetensia konosé diferente distansia, te maksimal 68 kilometer. Se-



gun Tiroler Zeitung, e hulandes tabata partisipando na 32 kilometer. Mas òf ménos na mitar kaminda el a sak den otro.

Pa diskurso di Rei Willem Alexander

Emoshon i alabansa pero tambe krítika

DEN HAAG – E Tweede Kamer a preferá di despensa ku Rei Willem Alexander a pidi pa pasado di sklabilitut Hulandes, a lòs hopi emoshon serka e públiko. Tabatin palabranan di alabansa pa e tono di e diskurso i tambe tokante e pregunta kiko ta bai bira awor e kontinuashon. Un parti di

Tweede Kamer a preferá di no mira niun despensa.

Den e anterior koloninan a risibí positivamente e despensa ku Promé Minister Rutte i awor tambe Rei a ofresé. Asina promé Minister di Kòrsou, Gilmar Pisas, ta papia di un momentu históriko.

Segun Pisas, Hulanda ku ánimo i responsabilidad a demostrá kon pa atendé asuntunan penoso di pasado. E despensa ta forma un kambio importante den e relashon entre Kòrsou i Hulanda.

Presidente di Sürnam, Chan Santokhi, ta yama e despensa bon biní, pero ta agregá ku su gobièrnu lo no reashoná mesora, pasobra e ke haña kontesta amplio den su pais kon Hulanda i Sürnam awor ta bai mas aleu. E heridanan di 300 aña sklabilitut no ta kita fásil.



Mucha ta menasá otro ku kuchú

DEN HAAG – Un mucha di nuebe aña di Den Haag a menasá un otro mucha di seis aña ku un kuchú. Polis tabata lihé na e sitio i a tuma e kuchú den beslag. No a detené e mucha di nuebe aña.

“Danki Dios e kolegan tabata na tempu aserka,” e tim básiko di Polis ta skirbi riba media sosial. E notifikashon a drenta djárason serka Polis via di e mayor di e mucha di seis aña. Una bes na e sitio, e

agentenan a haña e kuchú serka e mucha di nuebe aña.

No ta persiguí e mucha di nuebe aña. No por persiguí mucha bou di 12 aña si nan violá lei. Sí polis i e mama a papia seriamente ku e mucha. Segun Polis, tabatin kombersashon kla tokante e seriedat di e situashon. Tambe a hasi registrashon. Esaki ta nifiká ku e informashonnan di e mucha awor ta den e sistema di Polis. Ya e mucha tin nos atenshon, algu ku bo no

mester ta orguyoso di dje na un edat asina, Polis ta skirbi riba Facebook. Komo ku e mucha ta menor di edat, a hasi notifikashon tambe serka Veilig Thuis. For di ei nan por ofresé ayudo.

Segun Polis, e mucha a bini ku e kuchú for di kas. P’esei Polis ta advertí mayornan pa paga tinu riba nan yunan. Mira den nan tas i saku promé ku nan bai hunga pafó i hasi esaki un tema diskutibel promé ku aksidente tuma lugá.

Investigashon mucha ku a muri durante operashon

DEN HAAG – Ministerio Públiko ta hasiendo un investigashon pa kousa di morto di un mucha di tres aña den un hospital na Den Haag. A base di fuentenan, De Telegraaf ta skirbi ku algu a bai robes durante un operashon di wowo na Juliana Kinderziekenhuis, ku ta kai bou di HagaZiekenhuis. Ministerio Públiko ta konfirmá ku e mucha durante e operashon a haña muchu poko aire.

“Pa tratamentu spesífiko pa salba su bida, e momentu ei a hib’é na un

otro hospital, pero sin resultado. Tres dia despues e mucha a muri ei nan,” Ministerio Públiko ta skirbi den un splikashon kòrtiku. Ei den tin tambe ku ta investigando e hospital enbolbí.

Un bosero no ke bisa mashá, pero ta konfirmá ainda ku no ta hopi biá ku Ministerio Públiko ta enbolbí ku un investigashon di prosedura médiko. Den e kaso akí ta mira si a atendé segun prosedura. Segun De Telegraaf ainda e mayornan no a reashoná riba e informe.



Burgemeester di shòk tokante sklabilitut moderno

WOERDEN -- Burge-meester Molkenboer di Woerden a reashoná di

shòk riba e detenshon di un muhé djárason den e bario Kamerik. Ta sospechá e

muhé di negoshi di hende, pasobra el a probechá di un otro muhé pa 15 aña largu den su empresa.

E siman akí FIOD i Inspekshon di Labor a hasi un entrada den e empresa di e sospechoso di 53 aña. Di ki tipo di empresa ta trata, no ta konosí. En todo kaso no ta trata di un empresa di kunuku, e burgemeester ta bisa.


Desde 2008 lo a malusá

e víktima. Segun Inspekshon di Labor, nunca a paga e muhé pa su trabounan. Tambe tin menshon di dianan di trabou largu i kitamentu di libertat personal.

Segun e inspekshon, e muhé tabata biba bou di kondishon pover den un karavan riba e tereno di e empresa. E karavan no ta seif pa kandela. E municipio p’esei a ser’é mesora.

E ta ekstraordinario un situashon tristu. Hopi fuerte ku por tuma lugá i ku hende por hasi algu asina ku otro, e burgemeester ta reashoná serka RTV Utrecht.

E edat di e muhé ku a hasi mal uso di dje no ta konosí. E víktima, segun e burgemeester tabata deskuidá. E akomod’é na un lokalidat sekreto i ta bayendo bon kuné.



KÒRSOU

Selebrashon dia di bandera



ARUBA

17 Aña di prizon pa Shanon Williams pa asesinato di Eddy Rincon

ORANJESTAD -- Si man pasa Corte den Prome Instancia a dicta sentencia den e caso di asesinato di e hoben Eddy Rincon kende a wordo asesina e anochi di 30 di November 2022 riba caminda pa tanki di Savaneta. Loke a facilita e investigacion pa autoridadnan policial, tabata e hecho cu despues cu tres hoben a bay laga e victima Rincon benta riba caminda cu herida di bala na su heup, e tabata bon na conocimiento y entre otro a bisa un señora cu ta biba net banda di sitio caminda tur cos a sosode pero tambe e victima tabatin forsa ainda pa duna e oficialnan di polis cu a yega na e sitio prome, tur informacion pa loke ta Shanon

cu a tira pa horta su placa.

Un declaracion contundente e victima a informa polisnan, esta cu el a bisa Shanon kende a hinca mas despues den saco di carson pa coy su placa: “bo a horta mi placa caba, no tira mi,” dunando indicacion cu e asesino simplemente no tabatin respet pa su amigo Rincon. Shanon mes no a duna ningun tipo di declaracion inicialmente y ta hopi mas despues el a entrega un declaracion na Corte riba loke lo a pasa segun su concepto pero ayera mainta Hues a muestra riba diferente declaracion di testigonan, entre cual e otro acusado Ka Min Lin pero tambe e mucha muhe menor di edad cu tabata e anochi fatal den

e auto.

Tur dos a splica kico a pasa y cu tur dos a declara cu Shanon a riba e victima na momento cu el a purba di bula for di e auto mientras cu tambe tin e declaracion di otro testigo, di un señora kende ta biba cerca di e luga di e incidente y kende tambe a bay asisti e victima kende a cont’e kico a pasa. Pues e declaracion entrega pa Shanon durante tratamiento di e caso, no a cambia e situacion y ayera mainta Hues a inform’e cu ta bon cla cu el a tira Eddy Rincon pa kita su placa for di dje y cu ningun momento por a prueba cu ta e victima tabata debe Shanon e suma di 50 florin. Mientras cu Ministerio Publico durante tratamiento di

e caso a pidi Corte pa impone un castigo di 19 aña di prizon pa e hecho serio aki, ayera mainta Hues a impone un castigo di 17 aña di prizon y e acusado tin dos siman pa apela e decision di Corte den Prome Instancia. Na mes momento tambe Hues a dicta sentencia contra di e hoben Ka Min Li di 17 aña pa su involucramiento den e caso cual a resulta di no ta asina pisa y solamente a bin haya e hoben aki culpabel di tin arma di candela den su poder. Pa colmo no ta prome bes cu Ka Min ta dilanti Hues pa asunto di arma den su poder ya cu el a yega di sinta den KIA caba den pasado pa esaki y el a ricibi castigo condicional e tempo ey cu algun aña di prueba y awor a bolbe haya

su mes den otro situacion di arma di candela. Hues a impone un castigo di 15 luna di ‘jeugd detentie’ di cual 3 luna ta condicional y cu 3 aña di prueba y tambe e tin cu ser pone bou di Reclustering. Na mes momento Hues a informa e acusado aki cu e tabatin un castigo condicional di 3 luna colgando riba su cabes pa e caso anterior loke ta bin acerca di e castigo impone di cual dos di esaki ta ‘jeugd detentie.’

Ora cu mira e hobennan aki dilanti di Hues, nan ta parece muchanan cu ainda no a madura, cu ainda nan lo ta bayendo scol si tur cas tabata canando bon cu nan y awor tur dos ta figuranan cu record criminal, uno mas serio cu e otro.

ARTHUR DOWERS TA UN BERGUENSA PA NOS PAIS

Atacando autoridadnan ta mina principio democratico di e pais

ORANJESTAD -- Partido MEP a tuma nota di atakenan cu Parlamentario Arthur Dowers ta haci contra nos autoridadnan. Esaki, pa Partido MEP ta inaceptabel y ta un actitud cu ta mina principio democratico di nos pais. Ora un ciudadano, especialmente den un posicion di parlamentario ta falta respet na nos autoridadnan, ta malo pa e fundeshi di nos pais. Mas ainda biniendo di un ex minister di husticia di nos

pais, cu mester sa miho.

Mas di lamenta ainda ta cu señor Dowers di Fraccion di AVP ta ataca autoridad pa defende su colega Benny Sevinger, cu ta e corrupto di mas grandi di nos pais. Esaki sigur ta bisa nada bon di e parlamentario aki. Dowers ta un Parlamentario di nos pais cu riba su mes ya caba a perde tur credibilidad di nos pueblo y su actitud di ataca autoridadnan di nos pais pa defende un miembro corrupto di e Old Boys Club

di AVP, ta haci pio ainda pa su persona cu no solamente a perde credibilidad di Aruba pero awo tambe a perde credibilidad di Hulanda. Tur loke esaki ta bisa di Dowers ta cu e ta mesun corrupto of pio corrupto cu su amigo corrupto Benny Sevinger.

Parlamento, sigur Parlamentarionan di coalicion ta condena y rechasa e tipo di actuacionnan aki pasobra esaki ta un mal reflexion pa henter Parlamento y pa Aruba. Momento cu bo ataca autoridad, pa defende un corrupto, bo ta cuminsa mina

e principio democratico di bo pais. Dowers ta brongosa nos Parlamento y henter nos pais. Y pais completo mester rechasa e tipo di politica anticua di e Old Boys Club aki. Partido MEP sigur y henter Aruba mester condena e actitud aki di Dowers y lag’e sinti cu di berdad loke e ta haci ta un berguensa pa nos pais.

Aruba ta un destino inicial

Air Century ta amplia ruta desde Punta Cana

ORANJESTAD

-- Aruba ya caba ta hayando bishita di diferente aerolinea cu ta trece turista for di diferente destino directo, entre otro British Airways y tambe ultimo a ricibi e grato noticia cu Spirit Airways lo cuminsa bula tur dia. Wingo tambe a anuncia cu nan lo cuminsa bula pa Cali cu un vuelo directo.

Awo Air Century di Republica Dominicana, a anuncia nan proximo operacionnan durante e di XXII Feria CTN Expo Holiday na Santo Domingo, p’e temporada di winter.

E aerolinea a anuncia su plannan pa expande nan red di ruta fo’i Punta Cana, estableciendo como e di dos hub di e aereo-



linea. Den un esfuerzo pa fortalecer su presencia den e mercado, Air Century a comparti cu nan lo ofrece conexion directo fo’i Punta Cana na varios destino popular den Caribe. E destinonan inicial ta inclui Aruba, Sint Maarten, Corsou, Miami, San Juan, Cartagena, La Habana y Valencia (Venezuela). Cu e rutanen nobo aki nan kier ofrece e biaheronan un mayor flexibilidad y comodidad na ora di planifica nan biahe, n’e tempo cu e oportunidadnan turistico ta habri y negoshiden e region.

Felipe Gutierrez, director comercial di Air Century, a expresa e entusiasmo di e aerolinea pa amplia nan red y reforsa nan conectividad. E ambicioso proyecto di expansion di e rutanen di e compania lo cuminsa cu e ocho destino aki, cu plan di ampliacion den un futuro proximo. E obhetivo ta establece Punta Cana como un centro destaca den Caribe, ofreciendo e biaheronan un mayor accesibilidad y e oportunidad di explora un variedad mas amplio di destino.

Accidente cu herido pa falta di dunamento di preferencia

ORANJESTAD -- Diahuebs den oranan laat di atardi a sosode un accident cu un persona levemente herida, na altura di e crusada di Emmastraat cu John G. Emanstraat. Esaki tabata pa falta di dunamento di preferencia.

Chauffeur di e SUV biniendo di panort for di Emmastraat a sali dilanti

di un Chevrolet Spark, cu tabata riba e caminda di preferencia cu ta John G. Emanstraat. E impacto tabata den banda di e chauffeur di e Spark.

Ambos auto a haya basta daño material. Polis di trafico a presenta na e sitio y tambe a pidi pa presencia di ambulance pa atende cu e persona herida na e sitio.



Jossy Boekhoudt Ballpark un hoyo

KRALENDIJK--E bòl-park di Tera Kòrá konosí promé komo La Sonrisa Ballpark i awe komo Jossy Boekhoudt Ballpark, momentu ku esaki keda kla despues di su renobashon, esaki lo bira otro hoyo di un bòl-park aya na Tera Kòrá.

Na a momentunan aki por mensioná ku e part di yerba nobo ta práktikamente kla, na e momentunan aki ta toka e otro partinan di e bòl-park pa haña atenshon di renobashon.

Por bisa ku pa loke nos a mira fin di siman pasá, e

bòl-park aki un bia mas lo bira un hoyo di bòl-park momentu ku tur e trabounan di renobashon keda kla o sea ta kompletá.

Ya por mira tambe e “bòrchi skor” nobo ku ta na su lugá kaba.

Hopi trabou falta ainda

pero e trabounan ta kanando bon i segun plan si nos komprondé bon.

Nos ta deseá esnan enkargá ku renobashon di e bòl-park tur klase di éksito ku e trabounan pa na momentu ku tur e trabounan di renobashon ta tras di

lomba, nos haña nos un bia mas ku un hoyo di un bòl-park ku ta Jossy Boekhoudt Ballpark aya na Tera Kòrá o sea kaminda di bai Sorobon/Lac.

Riba potrèt e parti di yerba nobo di e bòl-park.



FC Champs a gana SV La Fama 3-2

KRALENDIJK--FC Champs djasabra último den un partido di futbòl veterano amistoso, a gana di SV La Fama den partido ku a tuma lugá mitar di seis atardi.

SV La Fama últimamente aya na Hulanda a gana di Ajax i ta kai vensí aki na Boneiru kontra FC Champs ku sigur ta un tremendo ekipo.

Di akuerdo ku e informashonnan di e Relashonista Públiko di FC Champs

ku ta sr. Urbano St. Jago, e golnan di FC Champs ta di Garindo Rapaela ku a hinka tur 3 gol di e partido.

E partido aki a tuma lugá na Fèlt Elion Flores.

Mas aleu sr. St. Jago ta informá ku FC Champs 50+ no tin wega djasabra awó.

Nan ta bèk riba tereno di futbòl dia 29 di yüli 2023.

Nan ta wanta un ratu ya ku tin hopi hungadó ku leshon.

Esaki pa duna nan chèns pa rekuperá di e leshonnan.

Juventus 3-2 riba Independiente

KRALENDIJK--E tim di futbòl di Antriòl Playa Pabou ku ta SV Juventus, djabièrnè último a gana di Independiente ku skor di 3-2, esaki den kontinuashon di e torneo di futbòl pa Kopa Dia di Boneiru.

E partido aki a tuma lugá djabièrnè último na Stadion Antonio Trenidad na Rincon.

Tabata Independiente ku a sali pika dilanti 1-0 den e partido, esaki ku gol di Luis Vega na di 24 minüt di e partido.

Despues di esaki Juventus ta reashoná i hinka dos gol sigui pa empatá 1-1 i pasa dilanti 2-1 den e partido.

Tabata Peterson Destina

na 33 minüt di e partido, ta anotá pa SV Juventus empatá e partido 1-1.

Despues di esaki, tabata Philberton Pourier na di 47 minüt di e partido, ta anotá pa SV Juventus bai den bentaha di 2-1 den e partido.

Angy Urango di Independiente despues di esaki ta anota na di 76 minüt di e partido, pa Independiente empatá e partido na dos, 2-2 pues.

Por último tabata Benedict Dirksz na di 78 minüt di e partido, ta manda Juventus dilanti 3-2, skor tambe ku e partido a finalisá den viktoria pa SV Juventus ku ta gana e partido pues ku skor di 3-2.





Rijksdienst Caribisch Nederland
RCN-Unit Sociale Zaken en Werkgelegenheid



BO TIN MESTER DI ARTÍKULO PA SKOL PA YU NA SKOL SEKUNDARIO?

Unidat SZW di RCN por yuda!

Kada aña bo por entregá petishon pa un kompensashon den gastunan di artíkulo pa skol i unifòrm. Si bo tin un yu, bo por bini na remarke ku un entrada nèto pa luna no mas ku 1.484 dòler. Ku dos òf tres i mas yu esaki no por ta mas ku 1.607 òf 1.731 dòler nèto pa luna.

Na luna di yüni i yüli bo por entregá petishon. Tira un bista riba nos wèpsait www.rijksdienstcn.com òf tuma kontakto ku nos na **715 8845** òf **795 5053** pa mas informashon.

Selekshon Pony U8 a biaha pa Merka

KRALENDIJK -Manera ya nos a trese na publisidat siman pasá, djasabra último den oranan di traimèrdia, un delegashon di Pony League ku ta e selekshon di muchanan U8 i nan “coach”nan a biaha pa Marion, IL USB, unda nan lo bai kompetí den e Pony

Pinto 8U World Series International Classic.

Boneiru lo ta hungando algun wega di fugeo den preparashon pa e “tournament” mes ku lo inisiá dia 6 di yüli 2023.

Esnan na kabes di e delegashon ta sinti ku nan ta bon prepará mentalmente

pa por duna bataya na nan kontrinkantenan.

Pa promé bia den historia ku Boneiru lo ta partisipando den un torneo di tal nivel ku edatnannan asina chikitu.

Esaki sigur ta e promé piedra pa un fundeshon stabil i un desaroyo pa un beis-

bòl duradero den futuro.

Den e selekshon a biaha ta konsistí di 15 hungadó i 4 “coach”.

Riba potrèt e delegashon promé di a subi avion rumbo pa Merka.



The most complete payroll and HR software in the Caribbean!

Payroll Pro
HRM

www.payrollprohrm.com

Download the mobile app!
Google Play | App Store

AKI TA TRAHA I DRECHA PLANCHA PA DJIENTE. BO TA WARDA MIENTRAS NAN TA DRECHE, SERVISIO RAPIDO.

djaluna pa djaweps: 9'or mainta pa 12'or merdia, 2'or te 4'or di atardi.

djabieme: 9'or mainta pa 12'or merdia, atardi ta SERA.

E.M. Rijswijk
Por yama pa un sita na tel. 717-2248 òf selular 796-3714
Kaya Dr. J.G. Hernandez s/n (banda di Botica Korona)

INSTALLATION INCLUDED

STARTING AT **\$549**

Smart shopping ▶ Better living

14" HP Laptop
Intel Celeron Quad
4 GB RAM
Windows 11

SPECIAL PRICE
\$399

OFFICIAL STORE

INSTALLATION INCLUDED

STARTING AT **\$695**

Bluetooth Speaker
\$189

INSTALLATION INCLUDED

STARTING AT **\$975**

Wireless Headset
\$99

Kaya International #36 717.3666 700.6442 CityShopBonaire